



Broj: 02-04-333/21  
Datum, 02.03.2021. godine

## ZAPISNIK

### sa 4. redovne sjednice 7. saziva Općinskog vijeća Doboj Istok

Četvrta redovna sjednica 7. saziva Općinskog vijeća održana je dana 25.02.2021. godine u zgradi općine Doboj Istok u Klokočnici sa početkom u 10,00 sati.

**PRISUTNI:** 15 vijećnika, Kemal Bratić, općinski načelnik, Omer Hadžić, sekretar općine, Abdulah Hrnjičić, ovlašteno lice da zamjenjuje pomoćnika općinskog načelnika za prostorno uređenje, Elvir Omerčić, zamjenik komandira Policijske stanice Doboj Istok, Taib Alihodžić, predsjednik MZ Lukavica Rijeka, Kenan Mujkić, direktor JZU Dom zdravlja Doboj Istok, Mirsad Džebić, sekretar MZ Klokočnica, Samir Mujkić, stručni saradnik za ruralni razvoj općine, te predstavnik RTV TK.

**ODSUTNI:** Izet Hodžić, zamjenik predsjedavajućeg Općinskog vijeća i Mehmed Mehinović, vijećnik SBiH.

Sjednicu je otvorio i vodio predsjedavajući Općinskog vijeća, Selmin Karić.

Selmin Karić, predsjedavajući Općinskog vijeća: „ Uvažene kolegice i kolege vijećnici, načelnice sa saradnicima, predstavnici medija esalamu alejkum i dobar dan. Otvaram 4. redovnu sjednicu 7. saziva Općinskog vijeća Doboj Istok. Zamolio bih tehničkog sekretara da utvrdi broj prisutnih na današnjoj sjednici. Prisutno je 15 vijećnika, a odsutni su Mehmed Mehinović i Izet Hodžić koji su najavili odsustvo, što znači da imamo kvorum za održavanje današnje sjednice.“

### USVAJANJE ZAPISNIKA SA PRETHODNIH SJEDNICA OPĆINSKOG VIJEĆA

Selmin Karić, predsjedavajući Općinskog vijeća: „ Dobili ste Zapisnik sa 3. redovne sjednice VII saziva Općinskog vijeća. Ima li neko primjedbi? Nema. Ko je za?“

Glasanje: ZA – 15, PROTIV – 0, UZDRŽANIH – 0.

### VIJEĆNIČKA PITANJA I INICIJATIVE

Selmin Karić, predsjedavajući Općinskog vijeća, je pitao vijećnike ima li neko vijećničko pitanje ili inicijativu.

Senada Džanić, predsjednica kluba vijećnika SBB – BPS – SBiH, je iznijela da ima dvije vijećničke inicijative. Prva vijećnička inicijativa: Obraćam se Općinskom vijeću, načelniku i Sportskom savezu Općine Doboj Istok da nađu način da se obezbjedi prostor koji bi se pretvorio u Spomen-sobu više puta proglašavanom Sportisti godine općine, rahmetli Osmanu Junuzoviću (mjesto Spomen-sobe čitaonica u Habibovićima). Osman Junuzović je, svojom skromnošću, dobrotom, kulturom, poštenjem i nadasve sportskim srcem stvarao prijateljstva širom Balkana, Evrope, Azije i Afrike. Na vijest o njegovoj smrti javljali su se prijatelji iz Etiopije, Rusije, Bugarske, Makedonije i mnogih drugih zemalja gdje je promovisao AK Doboj Istok i tako i općinu

*iz koje je dolazio. Za sve dobro i pozitivno što je donio u Općinu Doboj Istok da bi se malo odužili našem najboljem sportisti treba se organizovati prostor za sjećanje na njega. Mjesto koje će biti dokaz mladim naraštajima da je među nama živio, trenirao i pobjeđivao jedan od najboljih sportista u državi i šire. Ukoliko su potrebna određena materijalna sredstva vijećnici opozicije su spremni odreći se dijela paušala, a pozivamo i poziciju da nam se pridruže.*

*Druga vijećnička inicijativa se odnosi na potrebu izrade obilježenog pješačkog prijelaza preko magistralnog puta u Stanić Rijeci. U proteklih nekoliko godina u dijelu magistralnog puta koji prolazi kroz Stanić Rijeku, a gdje se nalaze dva ulaza u dva dijela naselja desilo se nekoliko saobraćajnih nesreća, a u dva slučaja smrtno su stradala dva pješaka. Na ovoj dionici nalaze se i dva autobuska stajališta, centralna trgovina naselja i dva privredna subjekta zbog čega je velika frekvencija pješaka i vozila. Zbog svega navedenog potrebna je izrada obilježenog pješačkog prijelaza na kolovozu i svjetlosnog znaka kako bi se ubuduće olakšao izlaz iz naselja, prelazak preko magistrale i izbjegle saobraćajne nesreće.*

*Kemal Bratić, općinski načelnik, je objasnio da su već poduzete aktivnosti vezano za spomen sobu posvećenu rahmetli Osmanu Junuzoviću, odnosno da će u prostorijama Osnovne škole Klokotnica biti soba u kojoj će biti izložen čitav njegov život.*

*Hasan Hasančević, predsjednik kluba vijećnika SDA, je iznio da su i u sklopu Sportskog saveza poduzete aktivnosti da se ne zaboravi ime ovog sportiste, odnosno da će se napraviti nagrada Osman Junuzović, te da će se održati izbor sportiste godine koji će zbog ove situacije proteći u znaku COVID-a, zatim atletski miting u saradnji sa Atletskim klubom.*

*Senada Džanić, predsjednica kluba vijećnika SBB – BPS – SBiH, je pohvalila aktivnosti koje su poduzete vezano za Osmana Junuzovića, te je spomenula da je na sjednici održanoj 30.01.2016. godine bila vijećnička inicijativa za pokrivanje troškova odlaska u Ulcinj najboljem sportisti 2015. godine, koja je odbijena i ovo pominje samo iz razloga da se to ispravi, da ime Osmana Junuzovića ne bi bilo zaboravljeno. Traži da se vijećnici izjasne o njenoj inicijativi.*

*Emira Karić, predsjednica kluba vijećnika SDP, je podsjetila da vijećnici opozicije ne znaju sve radnje koje se preduzimaju, pa tako i za spomen sobu, ali smatra da je red da se o inicijativi izjasne, jer svi idu u istom pravcu i da bi se to trebalo podržati. Smatra da nema transparentnosti, te je pitala zašto nemaju Radio Gračanice na sjednicama Općinskog vijeća.*

*Kemal Bratić, općinski načelnik, je naveo da se u arhivu Općine može naći da su uvijek učestvovali i podržavali kako pripremu, tako i odlaske na takmičenja u skladu sa mogućnostima. Što se tiče spomen sobe poštovat će želje porodice, jer je ponudio roditeljima da se spomen soba napravi u holu Općine, ali su oni tražili da to bude u prostorijama Osnovne škole „Klokotnica“ pošto je Osman tu napravio prve atletske korake. Što se tiče druge inicijative vijećnice Senade Džanić podsjetio je da je nadležnost magistralnih puteva Federalna direkcija za ceste.*

*Senada Džanić, predsjednica kluba vijećnika SBB – BPS – SBiH, je iznijela da je voljela da nije morala da podsjeća Općinsko vijeće da je 30.01.2016. godine Mevludin Mehić, vijećnik SBB, podnio vijećničku inicijativu Općinskom načelniku i Sportskom savezu općine da u okviru svojih nadležnosti našim najboljim sportistima obezbijede bolju materijalnu podršku. Podrška je izostala. Smatra da su napravili dosta propusta i da treba da postoji spomen soba, ali da podržava želju porodice da to bude u Osnovnoj školi „Klokotnica“, jer ju boli da za 500 KM Osman nije mogao da ode na takmičenje. Što se tiče pješačkog prelaza u Stanić Rijeci zna da to nije naša nadležnost, ali da niko neće doći iz Sarajeva i reći šta treba uraditi da bi osigurali sigurnost građana, a posebno djece. Smatra da bi oni kao domaćini trebali inicirati da bi došlo do realizacije, te pita koliko žrtava treba biti u Stanić Rijeci da bi se nešto poduzelo.*

*Kemal Bratić, općinski načelnik, je zamolio prisutne da budu korektni i da nose masku, te predložio pauzu kako bi se dezinfikovala govornica. Zatim je naglasio da vijećnica ne može reći da se ništa nije uradilo, te da su imali ministre po vertikali i da su trebali uraditi nešto putem tih kadrova, ali su imali druge prioritete. Podsjetio je da je urađen trotoar i prostor ispred prodavnice i kafane i da je to urađeno u prethodnom mandatu. Dodao je da sada imaju vlast na Kantonu i da mogu vršiti pritisak. Naglasio je da je njegov prioritet da izgrade cijelu lokalnu zajednicu, te zamolio vijećnicu kada se bude vraćala kući da pogleda šta je sve urađeno.*

*Senada Džanić, predsjednica kluba vijećnika SBB – BPS – SBiH, je navela da kada je u pitanju interes lokalne zajednice da trebaju svi i Općinsko vijeće i Općinski načelnik da gledaju da doprinesu boljem Doboj Istoku i da idu prema višim nivoima vlasti.*

*Emira Karić, predsjednica kluba vijećnika SDP, je zatražila pauzu da se otklone tehnički problemi obzirom da mikrofoni ne rade i ne čuje šta se govori za govornicom.*

*Predsjedavajući je dao pauzu dok se otklone tehnički problemi.*

*Senada Džanić, predsjednica kluba vijećnika SBB – BPS – SBiH: „ Ja još nisam imala priliku da se o nekoj inicijativi ne izjašnjavam i samo želim napomenuti da je stvarno mjesto lokacije, evo ja se slažem i drago mi je da će to biti u školi u Klokočnici, da je ono nebitno i hvala Bogu bit će ispoštovana želja porodice, tako da mislim da se svakako trebamo izjasniti o pomenutoj inicijativi.“*

*Haris Sinanović, vijećnik SDP: „ Poštovani predsjedavajući, načelnice, vijećnici i vijećnice, predstavnici medija, ostali građani. Ja imam jedno vijećničko pitanje. U mjesecu oktobru 2020. godine u Mjesnoj zajednici Stanić Rijeka počelo je uređenje korita rijeke ispod magistralnog puta. Moje vijećničko pitanje glasi: Na osnovu kojeg projekta ili odluke je finansirano uređenje korita i da li je i kada planiran nastavak radova?“*

*Kemal Skopljak, vijećnik BPS – Sefer Halilović: „ Prije svega pošto prvi puta izlazim želim da pozdravim i poselamim sve prisutne. Ja imam jednu inicijativu. Predmet: Inicijativa za sufinansiranje kupovine lijekova koji nisu na esencijalnoj listi, a služe za liječenje pacijenata oboljelih od virusa COVID – 19 na području općine Doboj Istok. Obrazloženje: Svi smo svjedoci da se pacijentima koji obole od korona virusa nažalost propisuju lijekovi koji nisu na esencijalnoj listi. Ti lijekovi za sedam dana liječenja jednog pacijenta koštaju od 300,00 KM do 600,00 KM zavisno od težine infekcije. Lijekovi koji se propisuju su CINK tablete, vitamin D3 tablete, Aspirin 500 tablete, Kleksan ampule, Cefazolin ampule, Urbazon ampule i Dexametazon ampule. Cijena tih lijekova je prevelika za većinu naših sugrađana i većina nije u mogućnosti da odvoji taj novac za kupnju navedenih lijekova. Nažalost kanton pa ni država nisu imali dovoljno razumijevanja, pa ni sluha da u startu građane oslobode plaćanja tih lijekova, a koji su neophodni za uspješno liječenje od korona virusa. U našoj opštini do danas smo imali oko 370 oboljelih, a u zadnjem mjesecu oko 20 pozitivnih pacijenata. Predlažem da se iz budžeta opštine bar sa po 100,00 KM pomogne tim pacijentima da bi finansijski lakše podnijeli kupovinu navedenih lijekova. Time bi pokazali da imamo empatiju prema našim sugrađanima, a u međuvremenu da se uputi inicijativa prema Ministarstvu zdravstva Tuzlanskog kantona i Fondu zdravstvenog osiguranja da se pod hitno na esencijalnu listu stave svi lijekovi koji se koriste u liječenju od virusa Covid 19. Sredstva za pomoć oboljelim mogu se povući iz budžetske rezerve.“*

*Selmin Karić, predsjedavajući Općinskog vijeća: „ Ima li još neko nešto? Nema prijavljenih. Prva inicijativa Saveza za bolju budućnost, vijećnica Džanić Senada, vijećnička inicijativa: Obraćam se Općinskom vijeću, načelniku i Sportskom savezu Općine Doboj Istok da nađu način*

da se obezbijedi prostor koji bi se pretvorio u Spomen-sobu više puta proglašavanom Sportisti godine općine, rahmetli Osmanu Junuzoviću (mjesto Spomen-sobe čitaonica u Habibovićima). Osman Junuzović je, svojom skromnošću, dobrotom, kulturom, poštenjem i nadasve sportskim srcem stvarao prijateljstva širom Balkana, Evrope, Azije i Afrike. Na vijest o njegovoj smrti javljali su se prijatelji iz Etiopije, Rusije, Bugarske, Makedonije i mnogih drugih zemalja gdje je promovisao AK Doboj Istok i tako i općinu iz koje je dolazio. Za sve dobro i pozitivno što je donio u Općinu Doboj Istok da bi se malo odužili našem najboljem sportisti treba se organizovati prostor za sjećanje na njega. Mjesto koje će biti dokaz mladim naraštajima da je među nama živio, trenirao i pobjeđivao jedan od najboljih sportista u državi i šire. Ukoliko su potrebna određena materijalna sredstva vijećnici opozicije su spremni odreći se dijela paušala, a pozivamo i poziciju da nam se pridruže. Imali smo objašnjenje načelnika da je u toku realizacija vezano za ovu inicijativu, ali obzirom da kolegica insistira ja dajem na izjašnjanje. Ko je za ovu inicijativu?

Glasanje: ZA – 5, PROTIV – 0, SUZDRŽANIH – 10.

Znači ova inicijativa nije dobila potrebnu većinu.

Sljedeća inicijativa se odnosi na potrebu izrade obilježenog pješačkog prijelaza preko magistralnog puta u Stanić Rijeci. U proteklih nekoliko godina u dijelu magistralnog puta koji prolazi kroz Stanić Rijeku, a gdje se nalaze dva ulaza u dva dijela naselja desilo se nekoliko saobraćajnih nesreća, a u dva slučaja smrtno su stradala dva pješaka. Na ovoj dionici nalaze se i dva autobuska stajališta, centralna trgovina naselja i dva privredna subjekta zbog čega je velika frekvencija pješaka i vozila. Zbog svega navedenog potrebna je izrada obilježenog pješačkog prijelaza na kolovozu i svjetlosnog znaka kako bi se ubuduće olakšao izlaz iz naselja, prelazak preko magistrale i izbjegle saobraćajne nesreće. I za ovo smo imali objašnjenje, ali i ovu inicijativu dajem na izjašnjanje. Ko je za?

Glasanje: ZA – 5, PROTIV – 0, SUZDRŽANIH – 10.

Sljedeća vijećnička inicijativa vijećnika Kemala Skopljaka.

Predmet: Inicijativa za sufinansiranje kupovine lijekova koji nisu na esencijalnoj listi, a služe za liječenje pacijenata oboljelih od virusa COVID – 19 na području općine Doboj Istok.

Obrazloženje: Svi smo svjesni da se pacijentima koji obole od korona virusa nažalost propisuju lijekovi koji nisu na esencijalnoj listi. Ti lijekovi za sedam dana liječenja jednog pacijenta koštaju od 300 KM do 600 KM zavisno od težine infekcije. Lijekovi koji se propisuju su CINK tablete, vitamin D3 tablete, Aspirin 500 tablete, Kleksan ampule, Cefazolin ampule, Urbazon ampule i Dexametazon ampule. Cijena tih lijekova je prevelika za većinu naših sugrađana i većina nije u mogućnosti da odvoji taj novac za kupnju navedenih lijekova. Nažalost kanton pa ni država nisu imali dovoljno razumijevanja, pa ni sluha da u startu građane oslobode plaćanja tih lijekova, a koji su neophodni za uspješno liječenje od korona virusa. U našoj opštini do danas smo imali oko 370 oboljelih, a u zadnjem mjesecu oko 20 pozitivnih pacijenata. Predlažem da se iz budžeta opštine bar sa po 100 KM pomogne tim pacijentima da bi finansijski lakše podnijeli kupovinu navedenih lijekova. Time bi pokazali da imamo empatiju prema našim sugrađanima, a u međuvremenu da se uputi inicijativa prema Ministarstvu zdravstva Tuzlanskog kantona i Fondu zdravstvenog osiguranja da se pod hitno na esencijalnu listu stave svi lijekovi koji se koriste u liječenju od virusa Covid 19. Sredstva za pomoć oboljelim mogu se povući iz budžetske rezerve.

Ovu inicijativu dajem na izjašnjanje. Ko je za?

Glasanje: ZA – 5, PROTIV – 0, SUZDRŽANIH – 10.

Znači ni ova inicijativa nije dobila potrebnu većinu.“

## **USVAJANJE DNEVNOG REDA**

Selmin Karić, predsjedavajući Općinskog vijeća: „ Za današnju sjednicu je predlažem sljedeći dnevni red:

1. Razmatranje i usvajanje prijedloga Odluke o dodjeli izuzetnog općinskog priznanja,
2. Razmatranje i usvajanje prijedloga Odluke o dodjeli općinskih priznanja,
3. Razmatranje i usvajanje prijedloga Odluke o izmjenama i dopunama Poslovnika o radu Općinskog vijeća Doboj Istok
4. Razmatranje i usvajanje Izvještaja o radu Zajedničkog pravobranilaštva Čelić, Teočak, Sapna i Doboj Istok za 2020. godinu,
5. Razmatranje i usvajanje Izvještaja o rješavanju upravnih stvari u upravnom postupku u općini Doboj Istok za 2020. godinu,
6. Razmatranje i usvajanje izvještaja o radu savjeta mjesnih zajednica za 2020. godinu i to:
  - Mjesna zajednica Klokočnica
  - Mjesna zajednica Brijesnica Velika
  - Mjesna zajednica Brijesnica Mala
  - Mjesna zajednica Stanić Rijeka
  - Mjesna zajednica Lukavica Rijeka
7. Razmatranje i usvajanje Izvještaja o radu Komisije za utvrđivanje prometne vrijednosti nepokretnosti i prava za 2020. godinu,
8. Razmatranje i usvajanje Informacije o sigurnosti na području općine Doboj Istok za 2020. godinu,
9. Razmatranje i usvajanje Informacije o pripremnim aktivnostima za proljetnu sjetvu 2021. godine,
10. Informacija o stanju pandemije koronavirusa (COVID-19) na području općine Doboj Istok za period 01.03.-31.12.2020. godine.

*Dnevni red dajem na razmatranje.“*

*Emira Karić, predsjednica kluba vijećnika SDP: „Ja bih samo imala primjedbu na šestu tačku Razmatranje i usvajanje izvještaja o radu savjeta mjesnih zajednica za 2020. godinu i poredane su mjesne zajednice. Zašto je to jedna tačka dnevnog reda, odnosno zašto nisu razdvojeni ti izvještaji? Da se vratim retrospektivom, na prošlom sazivu Općinskog vijeća insistirali ste da se informacije naše tri škole, dvije osnovne i jedne srednje škole, da li o upisu učenika, da li o uspjehu, razdvoje. Naravno tada vam je bilo interesantno, jer ste htjeli nekoga malo kao ošamariti. Smatram da bi istom tom logikom trebalo razdvojiti izvještaje mjesnih zajednica, odnosno to je samo uputa predsjedavajućem da na Kolegiju koristi jedan ili drugi sistem.“*

*Selmin Karić, predsjedavajući Općinskog vijeća: „Mi smo na Kolegiju utvrdili dnevni red kolegice, vi ste bili prisutni i niste imali nikakvu primjedbu, a mogli ste tada reagovati. Ima li još neko? Ko je za ovakav dnevni red?“*

*Glasanje: ZA – 15, PROTIV – 0, SUZDRŽANIH – 0.*

## **REALIZACIJA DNEVNOG REDA**

### **Ad. 1. Razmatranje i usvajanje prijedloga Odluke o dodjeli izuzetnog općinskog priznanja.**

*Selmin Karić, predsjedavajući Općinskog vijeća: „Tačku dajem na diskusiju. Ima li prijavljenih? Nema. Ko je za?“*

*Glasanje: ZA – 15, PROTIV – 0, SUZDRŽANIH – 0.*

*Obzirom da se ova tačka usvaja dvotrećinskom većinom Odluka je dobila potrebnu većinu.“*

**Ad.2. Razmatranje i usvajanje prijedloga Odluke o dodjeli općinskih priznanja,**

*Selmin Karić, predsjedavajući Općinskog vijeća: „Imate od Komisije za općinska priznanja i odlikovanja izvještaj. Tačku dajem na diskusiju. Nema prijavljenih. Ko je za?“*

*Glasanje: ZA – 15, PROTIV – 0, SUZDRŽANIH – 0.*

**Ad.3. Razmatranje i usvajanje prijedloga Odluke o izmjenama i dopunama Poslovnika o radu Općinskog vijeća Doboj Istok**

*Selmin Karić, predsjedavajući Općinskog vijeća: „Imate pred sobom prijedlog Komisije za statut i propise. Tačku dajem na diskusiju. Ima li prijavljenih?“*

*Emira Karić, predsjednica kluba vijećnika SDP: „Malo sam sačekala, jer sam mislila da će predsjednik Komisije za statut i propise izaći i nešto razjasniti. Evo dat ću sebi za pravo, bila sam kao član prisutna na sastanku i bit ću iskrena da je predsjednik u saradnji sa sekretarom Općine na taj sastanak donio zaista dobre prijedloge kada je u pitanju ova tačka dnevnog reda. Skoro sa svim prijedlozima smo se složili, bilo je nekih odstupanja i na osnovu određenih diskusija i argumenata te su se stvari riješile i jednoglasno smo donijeli odluku, odnosno izglasali da upravo nazivi komisija budu ovakvi kako ste dobili. Po meni ovo je jako dobro urađeno i smatram da su komisije dobile neki širi dijapazon rada, da imaju materijala za djelovanje, naravno ukoliko budu zainteresirani, predsjednici prvenstveno, da te komisije rade kako treba. Moram reći juče je načelnik bio na jednoj komisiji u Kantonu i dobio određene materijale koji su itekako stručni. Želim da naglasim da ne bi trebalo nebitnost komisija da bude na ovoj razini vlasti, odnosno da isto tako one budu jako bitne, da raspravljaju o mnogim stvarima o kojima trebaju raspravljati, da donose prijedloge i zaključke i naravno da to prilažu Općinskom vijeću, tako da ću ja sama, a i klub, biti za ovu Odluku o izmjenama i dopunama Poslovnika o radu. Da li će se on mijenjati u budućnosti, ja vjerujem da hoće i želja mi je da hoće, što znači da će stvari unapredovati, a nikako unazadovati.“*

*Selmin Karić, predsjedavajući Općinskog vijeća: „Ima li još prijavljenih? Nema. Tačku dajem na glasanje. Ko je za?“*

*Glasanje: ZA – 15, PROTIV – 0, SUZDRŽANIH – 0.*

**Ad.4. Razmatranje i usvajanje Izvještaja o radu Zajedničkog pravobranilaštva Čelić, Teočak, Sapna i Doboj Istok za 2020. godinu,**

*Selmin Karić, predsjedavajući Općinskog vijeća: „Imamo jednu obavijest ovdje od općinskog pravobranioaca. Poštovani, dana 19.02.2021. godine putem faxesa zaprimili smo poziv na 4. redovnu sjednicu Općinskog vijeća općine Doboj Istok, a na kojoj će biti razmatran i izvještaj o radu ovog organa. Na navedenu sjednicu nismo u mogućnosti pristupiti iz razloga koji ne možemo odgoditi, jer smo ranije zaprimili poziv Okružnog suda Bijeljina za pristup na pripremno ročište, koje će se održati u 10,30 sati. Imamo prilog Poziv na zakazano ročište pred Okružnim sudom u Bijeljini. Evo bez obzira na to ako neko slučajno ima neko pitanje ili nešto.“*

*Emira Karić, predsjednica kluba vijećnika SDP: „Ovo je lično vama predsjedavajući, prvi puta ste na ovoj funkciji i tražim od vas da se držite principijelnosti bez obzira o čemu se radi, jer vjerujte mi, a koristit ću narodnu riječ, nastat će kuršlus u narednom radu Općinskog vijeća, dolazit će i odlazit će, a na kraju krajeva imat će argumenata da se pozovu na neke tačke koje su usvajane bez prisutnih koji treba da budu prisutni.“*

*Selmin Karić, predsjedavajući Općinskog vijeća: „ Ima li još prijavljenih? Nema. Tačku dajem na glasanje. Ko je za?“*

*Glasanje: ZA – 10, PROTIV – 0, SUZDRŽANIH – 5.*

**Ad.5. Razmatranje i usvajanje Izvještaja o rješavanju upravnih stvari u upravnom postupku u općini Doboj Istok za 2020. godinu,**

*Selmin Karić, predsjedavajući Općinskog vijeća: „ Tačku dajem na diskusiju. Ima li prijavljenih? Nema. Ko je za?“*

*Glasanje: ZA – 15, PROTIV – 0, SUZDRŽANIH – 0.*

**Ad.6. Razmatranje i usvajanje izvještaja o radu savjeta mjesnih zajednica za 2020. godinu i to:**

- *Mjesna zajednica Klokotnica*
- *Mjesna zajednica Brijesnica Velika*
- *Mjesna zajednica Brijesnica Mala*
- *Mjesna zajednica Stanić Rijeka*
- *Mjesna zajednica Lukavica Rijeka*

*Selmin Karić, predsjedavajući Općinskog vijeća: „ Tačku dajem na razmatranje.“*

*Emira Karić, predsjednica kluba vijećnika SDP: „ Čini mi se da smo nekako ubrzali ovu sjednicu, pa ću ja svoju diskusiju početi sa citiranjem Sofokla, antičkog mislioca, koji je rekao država u kojoj se pojedincu nedjela ne kažnjavaju pašće u duboku tamu. Smatram da se to upravo odnosi na našu državu, a upravo takva tama se reflektira i na rad mjesnih zajednica, odnosno na odnose prema tim mjesnim zajednicama. Po meni mjesne zajednice su jako ključne iako su neki ljudi prije nekoliko godina smatrali da treba ukinuti mjesne zajednice i ja smatram te ljude velikim nepoznavacima našeg društva. Čak što više mjesne zajednice treba jačati, jer su one produžena ruka općinske vlasti. Mjesne zajednice su po meni izuzetno dobri savjetnici Općinskom načelniku i općinskoj vlasti. Strategija razvoja općine Doboj Istok itekako treba da se prvo raspravlja na savjetima mjesnih zajednica, pa da službe to oblikuju, a ne kao kod nas da strategiju razvoja rade službe. Ja kao načelnica, da sam, imala bih jedan termin u mjesec dana i odredila bih sebi da zovem predsjednike mjesnih zajednica, ako ništa da ih pitam za zdravlje. Vjerovatno će se u tom bar telefonskom pozivu čuti određene stvari da li problematika, ukoliko je sve u redu i ukoliko bude kakva problematika onda se vjerovatno rješava na nekim sastancima, jer građanima prva stepenica kojima se obraćaju, po meni, je predsjednik, odnosno savjet mjesne zajednice. On u mjesnoj zajednici treba da dobije sve odgovore koje se tiču širokog dijapazona rada općine, u ovom slučaju općine Doboj Istok. Da je ulogu mjesna zajednica prije imala važnu, imala je. Da je sada nema, nema je i niko me ne može demantirati da je drugačije. Mjesne zajednice održavaju, vidjeli smo prema izvještaju, određeni broj sjednica, raspravlja se o nekoj tematici, međutim to je izgubilo značaj budući da su se građani udaljili od mjesne zajednice. Zašto su se udaljili? Vjerovatno zato što im se mjesna zajednica, odnosno savjeti i općina ne približavaju. Kažem, smatram da u budućnosti taj rad treba izdići bar na malo više distancu, boljom i većom saradnjom, jer ćete načelnice, otkloniti mnoge nedoumice koje možda imate da li rasvjeta, da li plaćanje parkinga ili bilo kakva strategija. Vidjeli smo odluku na nazivima ulica, to se tri puta spuštalo na mjesne zajednice i na kraju krajeva niko nije bio kriv od općinske vlasti zato što su upravo o tim stvarima rješavale mjesne zajednice, predsjednici i savjeti mjesnih zajednica. Mnoge takve odluke zaista treba spuštati. Žao mi je što se neki predsjednici sa načelnikom viđaju samo na nekim manifestacijama, bilo da je ih je organizovala općina ili vjerska zajednica, a ne da bar mjesečno imaju neki sadržaj o kojem mogu razgovarati.“*

*Kemal Bratić, općinski načelnik: „ Vaša diskusija kao da se odnosi na izvještaj o radu općinskog načelnika, a ne savjeta mjesne zajednice. Ja prije svega želim ovdje javno da se zahvalim svim predsjednicima mjesnih zajednica na jednoj dobroj i korektnoj saradnji. Sve ono što smo radili u prethodnom mandatu, radili smo putem inicijativa tih savjeta i kao što neko reče načelnik ne može znati sve probleme građana u svim mjesnim zajednicama, ali može putem savjeta odnosno, putem predsjednika mjesnih zajednica. Ja ne znam, ali kao da me neko prati da se ja viđam sa predsjednicima na manifestacijama. Ja se sa njima svakodnevno viđam i svakodnevno čujem. Jedino ako neko ima želju, ja ga pozivam da bude moj savjetnik, pa da vidi da je to drugačije nego što se ovdje iznosi za govornicom. Znači i sam sam bio predsjednik Savjeta 2003. godine, tako da znam koliko je to teško i koliko je to, da kažem, naporno. Da je bogdom taj neko ko je bio na mjestu na kojem se ja sada nalazim imao sluha kao što ga ja imam, bilo bi mi puno lakše i bilo bi mi puno bolje. Bilo je tu raznoraznih igara i malverzacija, a čak i ne priznavanja izbora u nekim savjetima mjesnih zajednica upravo iz nekakvih političkih razloga. Da li može bolje i da li mora bolje, može i mora, to uvijek kažem. Moramo znati da ti ljudi koji su birani, a izbori će biti ubrzo u maju, oni su volonteri i ja im se svima od srca zahvaljujem što se prihvataju, a prije svega što se kandiduju, a nakon toga kada budu izabrani i da budu u savjetu mjesne zajednice. To je specifična pozicija i ako ne znate pojačava se nadležnost savjeta upravo izmjenama i dopunama Zakona o lokalnim zajednicama. Svaka strategija UNDP, a mi učestvujemo u razgovorima, je upravo na jačanju savjeta mjesnih zajednica. Da uporedim, imamo pet savjeta i imamo 9 komisija i u tih 9 komisija neke se ističu, neko ih vodi bolje, neko slabije. Isto kao i savjete. Ne mogu se ja nametati savjetu mjesne zajednice, a moja su vrata ne samo za savjete, nego za svakoga otvorena i ovdje na poslu primam svakoga i razgovaram sa svakim. To što neko neće iz nekog tamo razloga da dođe gore, to je njegov problem, to je njegov lični problem. Ono što ja znam, tako sam odgojen, da bi dva čovjeka ili dvije žene sarađivali mora biti međusobno uvažavanje i poštovanje. Ukoliko ga nema, nema ni saradnje, naravno da nema saradnje, to svi znamo. Ne treba nama ovdje da neko puno objašnjava kako se dobro sarađuje. Ja odgovorno tvrdim sa svakim predsjednikom u svako doba, osim ako se neko napije, pa me zove u neko doba, ja se neću javiti. Evo vijećnica se nasmijala, jer zna o čemu se radi. To je problem međusobne saradnje. Ja mislim da se svi trebamo aktivno uključiti da nam savjeti budu što bolji. Zašto? Pa bit će nam svima lakše raditi. Imat ćemo dobre ideje, imat ćemo veće pritiske da radimo nešto, da svaki projekat u svakoj mjesnoj zajednici općinska administracija i ja, a naravno i vi, radimo na inicijativu savjeta mjesnih zajednica koje najbolje znaju šta ih žulja. Vi znate da ako se nabaca u jednom savjetu 70 prioriteta, da ne može biti 70 prioriteta. Hajmo po redu rješavati jedno po jedno. Još jednom ponavljam, bez obzira kakvi su ovi izvještaji, neki su bolji, a neki lošiji, ja im iskreno čestitam i zahvaljujem se, jer ovo je njihov zadnji izvještaj, na radu i na prihvatanju te pozicije. Znači kao što je Emira rekla oni su prvi tamo na udaru i svako im dolazi tražeći određene benefite za pokretanje određenih inicijativa. Opet pozivam sve predsjednike sadašnjih savjeta i budućih, ako Bog da, moja vrata su 24 sata otvorena, ali mora biti ono „međusobno uvažavanje i poštivanje“. Ja znam da neki savjeti nisu godinu dana održani, je li to do načelnika? Naravno da nije. Znam da su neki konstantno održavaju. Je li to do načelnika? Naravno da nije, čovjek saziva, ima potrebu. Tako da moramo voditi računa koga ćemo tamo postaviti, kako će čovjek raditi itd.“*

*Emira Karić, predsjednica kluba vijećnika SDP: „ Sa jednim dijelom se slažem, znači međusobno uvažavanje je broj 1. Međutim ako neko primijeti, shvati tokom rada, u svojoj glavi razumije da čelni čovjek i čelni ljudi ipak teže ka centralizaciji, onda od te saradnje neće biti ništa. Šta znači centralizacija? Znači da o svemu odlučuje jedan čovjek ili eventualno jedan ili dva do njega. Ako se to primijeti kod savjeta mjesnih zajednica i kod predsjednika, onda do saradnje neće doći. Opet kažem centralizacija što se tiče Bosne i Hercegovine i našeg društva nikako nije dobra, uvijek je bolje da više ljudi raspravlja o nekim stvarima.“*



*Haris Sinanović, vijećnik SDP : „ Ja se moram osvrnuti na rad Mjesne zajednice Stanić Rijeka sa informacijama sa kojima ja raspolazem. Dugo vremena već u Mjesnoj zajednici Stanić Rijeka ne funkcioniše masu stvari. Ovo što je načelnik govorio ruše se tamo članovi Statuta Mjesne zajednice Stanić Rijeka i ne održavaju se sastanci. Vidim ovdje nema ni predstavnika Mjesne zajednice Stanić Rijeka, ni predsjednika, ni zamjenika, ni potpisnika. Predsjednik Mjesne zajednice Stanić Rijeka je trenutno odsutan i nalazi se u Njemačkoj, a potpisao je ovaj izvještaj. Isto tako se, kako vidim ovdje u izvještaju, plaća sekretar Mjesne zajednice. Kako može biti u Njemačkoj mjesec, dva, tri, a biti plaćen. To se nalazi ovdje u izvještaju u bilansu stanja i bilansu uspjeha. Vratit ću se malo unazad od kada ne štima u Mjesnoj zajednici Stanić Rijeka. Igrom slučaja bio sam ovdje 2013. godine, kada je bio predsjedavajući doktor Konjić, kada je pokrenuta inicijativa za smjenu tadašnjeg predsjednika Mjesne zajednice rahmetli Huseina Džanića gdje je po Statutu trebalo prikupiti 100 potpisa od građana Stanić Rijeke. Ja sam izašao i tražio riječ ovdje kao građanin i predočio Općinskom vijeću falsifikovan potpis moje rahmetli majke. U tih 100 građana se nalazila i moja mati Sinanović Sabrija da se potpisala za smjenu predsjednika savjeta mjesne zajednice, a moja mati se potpisivala otiskom prsta i jedina osoba sa tim imenom i prezimenom je bila ona u Stanić Rijeci. Vraćam se samo, jer od te godine ne funkcioniše, a bit ću otvoren i reći da se radi o Mirsi Husakoviću. To je čovjek koji i vedri i oblači u Mjesnoj zajednici Stanić Rijeka. Bilo bi mi drago da je bar on bio ovdje pošto on rukovodi mjesnom zajednicom, da objasni nekoliko stvari. Primijetio sam ovdje jednu stvar, neću reći da je tačna, ali koliko me sjećanje služi prihodi od imovine, ovdje piše 7200 KM. To je od donjeg dijela Stanić Rijeke, čini mi se da je kirija 600 KM, 12 mjeseci to je 7200, a i piše tako. Međutim u prošlom sazivu Mjesne zajednice, u kojem sam bio i ja, firma je uložila neka značajna sredstva u opremanje doma i tada je sa tom firmom potpisano da će ti troškovi, koje je on uložio, biti, da se izrazim otkvitani kroz kiriju na pet godina. Mislim da je tih pet godina isteklo prije možda i godinu dana, a ti prihodi od imovine se ne nalaze ovdje. Možda griješim, ali čini mi se da je ovo tačno što govorim što se tiče prihoda od imovine. Zato bih zamolio načelnika da malo posveti pažnju, bez obzira što je kraj mandata. Prvo što mi sada imamo dva vijećnika u Savjetu mjesne zajednice, a to možda nije ni prijavljeno, koji nisu prisutni tu. Po Statutu Mjesne zajednice, mislim da je svaki statut mjesne zajednice približno isti, ako nije u mogućnosti da dolazi, bira se sljedeći sa liste. Ne znam da li sam rekao da od juna mjeseca 2020. godine sastanak u Mjesnoj zajednici Stanić Rijeka nije održan.“*

*Senada Džanić, predsjednica kluba vijećnika SBB – BPS – SBiH: „ U potpunosti se slažem sa diskusijom kolege Harisa i hvala mu što je ukazao na ove nedostatke. Tačno je da već godinu dana Savjet Mjesne zajednice nije imao sjednicu. Pitam se kako neko, ovo što je vijećnik Haris rekao, ako nije tu može potpisati izvještaj. Napomenut ću vijećnike koji su bili u prošlom sazivu Općinskog vijeća da ni tada nismo razmatrali izvještaj Mjesne zajednice Stanić Rijeka, jer nije bilo predstavnika. Je li to znači da sada ponovo nema predstavnika i mi ćemo taj izvještaj ostaviti ponovo i to je tako. Sve nepravilnosti koje su se dešavale mi ćemo prešutiti, zato što je ovdje kadija te tuži, kadija ti sudi. Sve što govorim nije politika, sve što radim nije politika. Govorim u interesu građana Stanić Rijeke. Prošli put sam rekla za problem sa rasvjetom od Polja, Komarevca, Hodžića, da ima puno pokvarenih rasvjetnih tijela itd. Kada sam to postavila kao vijećničko pitanje prije par godina, ne mogu se sjetiti, načelnik mi je rekao da je stepenica Mjesna zajednica Stanić Rijeka. Vjerujte mi, a to znaju članovi Savjeta, mogu vam donijeti te dokumente, da sam se sedam puta pismeno obraćala Savjetu Mjesne zajednice Stanić Rijeka s nadom da ćemo uspostaviti nekakvu saradnju i da zajednički nastupamo u interesu građana Stanić Rijeke. Na kraju sam bila prisiljena, jer Mirsad Husaković, tadašnji predsjednik, moram ispraviti Harisa, jer on nije sada predsjednik Mjesne zajednice, nego je kao tadašnji predsjednik Mjesne zajednice rekao da nije dobio poštu. Kada sam ja donijela i ono što sam slala preporučeno sa povratnicom da bi se desio sastanak, jer smatram da i mi kao vijećnici, predstavnici Mjesne zajednice, trebamo sjesti sa Savjetom i raspravljati o problemima. Ovo je sigurno za godinu dana da nije bilo sastanka Savjeta Mjesne zajednice i pitam se, jer vidim dva potpisa, jedan je potpis od osobe*

*koja je i sekretar i predsjednik Mjesne zajednice, koja se nalazi u Njemačkoj, a drugi je od Mirsada Husakovića i Humić Selima, koji je češće u Njmačkoj nego što je tu. Pitam se samo hoćete li vi u stvari samo dignuti ruku i u redu je, a građani Stanić Rijeke neka se i dalje pitaju gdje je adresa gdje se oni mogu obratiti za svoje probleme.“*

*Hasan Hasančević, predsjednik kluba vijećnika SDA: „ Mi pričamo o svim mjesnim zajednicama i kažemo nas su izabrali građani općine Doboj Istok. Svako priča o onome što ga boli, otprilike u svojoj mikro sredini ili ga boli neka administrativna prepreka tamo ko je predsjednik, ko nije predsjednik. Svaki puta kada je izvještaj mjesnih zajednica kažemo, pogotovo kolege i kolegice koje su tu, kada se biraju ili dovodimo na vlast nove de da predložimo nekoga ko valja i da pobijedi taj ko valja. Ima određeni broj vijećnika koji je prošao u Općinsko vijeće i ne može doći da bude član džematskog odbora, jer tamo mikro sredina zna kakav je on i ne može dobiti 10 glasova i mi to svi znamo. Ogroman je posao, slažem se sa vama. Ja ću ovdje nešto progovoriti, da sam ja član Savjeta Mjesne zajednice Klokočnica banka bi bila ovdje, odgovorno tvrdim. Zašto? Zato što bi ja udarao ko rudar u čekić i udri, udri dok se neko ne bi opametio. To je suština koga mi dovodimo tu gdje jest. Nažalost mi nemamo instrument privremeni izbori u mjesnoj zajednici i morat ćemo poraditi po statutu mjesnih zajednica i Općinskog vijeća i Poslovnika o radu što šta. Ko ne valja, brate dragi, izbori, nikom Bogom nije dato da mora biti četiri godine. Tako i za nas ovdje ako ne radimo, ali to je neki viši nivo, jer se imamo običaj udarati tim pravnim sistemom, viši nivo, Izborna komisija je donijela i mi moramo biti ovdje četiri godine. Ne moramo, ako ne radimo treba da idemo kući i neka dođu oni koji će raditi u interesu građana. Svi mislimo da smo nešto u pravu. Zamislite koliko samo treba za održavanje jedne mjesne zajednice i infrastrukture bilo čega. Ja neću ulaziti u rad savjeta mjesnih zajednica po pitanju saradnje sa načelnikom. Ja znam da načelnik prima predsjednike koji žele da razgovaraju sa njim. Ja pričam i sa onim koji ne žele da se malo razjasnimo i znam probleme te vrste. Nažalost kod nas je ovdje problem ko je to malo veći, ko je načelnik da ja kao predsjednik mjesne zajednice, morat ću reći narodnim jezikom, podvijem svoju repinu pa da dođem u interesu mjesne zajednice da riješim neki problem. Takve ljude mi moramo birati na pozicije predsjednika i članova savjeta mjesnih zajednica ubuduće. Najmanji problem je izvještaj o radu, problem je rad na terenu i koliko je mjesna zajednica zadovoljna sa njima.“*

*Senada Džanić, predsjednica kluba vijećnika SBB – BPS – SBiH: „Često se ja slažem sa kolegom Hasanom, pa ću i sada. Malo ću se i našaliti, ne mogu se oteti dojmu da je načelnik rekao za bilo koju parlamentarnu stranku da je nebitna, ali reći ću da mi iz te nebitne stranke na kojoj god smo dužnosti pristupamo jako odgovorno. Ovdje se radi o osobama koje su bliski saradnici načelnika. Znači to su istaknuti članovi Stranke demokratske akcije i ne vidim gdje je problem. Očigledno da tu nedostaje komunikacije. Ono što mene jako boli, nemojte mi zamjeriti moje glasovne mogućnosti nisu takve da pričam kroz masku, a vidim da pojedini sjede bez maske, pa ću reći da ne prenosi samo opozicija koronu. Htjela sam reći ono što mene boli, u Stanić Rijeci ima toliko djece koja bi rado obavljala posao sekretara, nezaposlene djece. Imamo porodica socijalno ugroženih, a ja vidim da se ovdje plaća posao sekretara nekog koji uopće nije u državi. Šta će sa tim sredstvima? Hoće li napraviti povrat sredstava za ovo što je naplatio, a ne radi? Zar se ne bi mogao za sekretara uzeti neko, vjerujte mi uopće mi nije bitno iz koje je političke partije, a kome bi jako dobro došao ovaj novac za posao sekretara i da postoji dan jedan u sedmici za rad da građani mogu doći u svoju mjesnu zajednicu i iznijeti određenu problematiku. Ja želim da čestitam svima onima koji istinski rade svoj posao u mjesnim zajednicama. Istaknut ću Mjesnu zajednicu Klokočnica, jer sam imala priliku da saradujem, a vidim i predstavnik je tu. Znam ja da ljudi pogotovo koji rade volonterski da je to za dobrobit zajednice i ja im čestitam i želim im puno uspjeha u radu, ali dajte ovo što se dešava, ne mjesec dana nego cijeli ovaj period u Stanić Rijeci, da ispravimo. Drugi razlog zašto pričam o Stanić Rijeci zato što kao građanka Stanić Rijeke najviše sam upućena u te probleme, pa očekujem da vijećnici koji dolaze iz svojih mjesnih zajednica više diskutuju o tome.“*

*Emira Karić, predsjednica kluba vijećnika SDP: „Ja se nadam da se Haris i Senada neće naljutiti, ali zaista bih favorizirala diskusiju kolege Hasana koju potpisujem takođe u cjelosti. Da li smo mi reprezentativni primjeri građana Doboja Istoka? To se onda isto treba odnositi i na Općinsko vijeće. Spustili ste se na nivo mjesne zajednice, a evo tokom ove sjednice imali smo prekršaja nekoliko. Ne usvajanje inicijativa nije prekršaj, ali je moralni kodeks. Usvajamo izvještaje i informacije, a nemamo prisutnih koji treba da budu i koji treba da nam odgovore na određena pitanja. Tako da mislim da smo i mi ovdje neki promašaj kada se kandidujemo na listu Općinskog vijeća, pa onda da pričamo o Kantonu, Federaciji itd. Potpisujem, ali hajde prije svega da mi budemo lično primjer kako se treba ponašati, kakva treba da bude korektnost, kakva treba da bude jednoobraznost, a ne pro forme da ja ovdje izađem i moja diskusija se istrpi i idemo dalje. Ako ćemo biti interesantni na sljedećoj sjednici vi ćete to razdvojiti i ako treba nekoga po ušima, a to je nekorektnost i takvi ljudi ne trebaju da budu primjeri vijećnika u Doboju Istoku.“*

*Hasan Hasančević, predsjednik kluba vijećnika SDA: „ Očito kolegica nije slušala kada sam ja diskutovao, jer ja sam naglasio i za nas vijećnike to važi, ali viši nivo donosi da li ćemo mi biti četiri godine ili manje. Ja čvrsto stojim iza toga da za inicijativu koja je podnesena, a koja je u toku, ne mogu glasati i neću. Drugo, kada je inicijativa samo prijedlog, pa ja bih sa ovog ili onog, de da ja podnesem inicijativu da vi nešto uradite, ni za tu inicijativu nikada neću glasati, pa da ja nalažem nekome da nešto radi. Prvo ja počnem oko te inicijative čeprkati, donositi zaključke i rješenje inicijative, pa ako neće taj, onda ja to tako završim. Ja takve inicijative, za sebe govorim, nikada neću podržati, jer to su demagoške inicijative. Po koleginioj inicijativi ja bih dobio, koliko ste predložili? 100 KM, a ja sam za 7 dana platio 385 KM za lijekove i injekcije. Slažem se sa dijelom inicijative da trebamo uputiti gore u Ministarstvo zdravlja da se to stavi na neku listu. Znači inicijative sa korektnim prijedlozima prolaze, ali ovo. Uvijek kritikujem sebe prvo, da nije tako kritikovao bih pojedinačno Savjet Mjesne zajednice Mala Brijesnica, a nisam nikada ružne riječi rekao. Sjećate se, ni u prošlom sazivu, a ni u ovom, nikada, a u političkom smislu nismo isti.“*

*Emira Karić, predsjednica kluba vijećnika SDP: „Kolega Hasane, kada se čovjek pripremi za neku inicijativu, fino ju pripremi, obrazloži, čak da svoja materijalna sredstva i traži pomoć od drugih ljudi koji bi uložili u nešto svoja materijalna sredstva. Sjećate li se one zastave, rekla sam sve ću vam nabaviti, nemojte se sekirati i stup i to platno za zastavu Bosne i Hercegovine, a vi ste tu inicijativu odbili. Znači bilo je po meni korektno, sve vam nudim i samo lokacija. Sljedeća inicijativa je bila upućena prema mjesnim zajednicama o bačvama za smeće na određenim lokacijama. Otišla je prema mjesnim zajednicama, komunalno je pristalo da vrši odvoz tog smeća, međutim ni jedna mjesna zajednica tu inicijativu nije podržala. Ko je za te stvari odgovoran? Ko treba da se ovdje oglasi, da li da ga kritikujemo itd.“*

*Kemal Skopljak, vijećnik BPS – Sefer Halilović: „Ja bih predložio ubuduće kod izvještaja mjesnih zajednica pod broj 1. obavezno da se razdvoji svaka tačka, jedna tačka, jedna mjesna zajednica. Ja sada dolazim u dilemu, jer možda ja jedan izvještaj ne bih podržao, ali moram ako budemo u cjelini glasali. Pod broj 2. želim ako je moguće da se napravi urnek izvještaja mjesnim zajednicama i da imamo jednoobrazne izvještaje gdje možemo uporediti da jednostavno vidimo ko je šta i koliko radio. Ovako imamo nabacane stvari. Svi su oni radili i svima se ja zahvaljujem i na trudu i na radu, međutim kako možemo uporediti. Ne možemo nikako ako nemamo jednoobrazan urnek izvještaja. Znači obavezno razdvojiti ove tačke da glasamo o svakom izvještaju posebno. Kolega hvala vam na nerazumijevanju.“*

*Selmin Karić, predsjedavajući Općinskog vijeća: „ Mi donosimo Program rada i usvajamo ga na početku godine, a Kolegij utvrđuje dnevni red i svako je mogao predložiti da ide ovako kako*

*ste rekli, pa ubuduće možemo tako. Ima li još diskutantata? Ako je replika može, ako nije ne može, jer ste izlazili kolega.“*

*Haris Sinanović, vijećnik SDP : „Iz principijelnosti, pošto predstavnici nekih mjesnih zajednica nisu tu i ne možemo dobiti odgovore na neka pitanja mi ćemo biti suzdržani po ovom pitanju.“*

*Selmin Karić, predsjedavajući Općinskog vijeća: „Vi možete postaviti pitanja na koja ćete dobiti odgovor u narednom periodu. Ima li još? Nema. Dajem tačku na izjašnjavanje. Ko je za?*

*Glasanje: ZA – 10*

*Omer Hadžić, sekretar općine: „ Izvještaji treba da idu po a, b, c ... i da se o svakom posebno glasa.“*

*Selmin Karić, predsjedavajući Općinskog vijeća: „Ovdje je jedna tačka i to smo trebali razdvojiti u dnevnom redu. Jedna je tačka dnevnog reda i ne možemo se parcijalno izjašnjavati. Kako treba Omere?“*

*Omer Hadžić, sekretar općine: „ Ovi su tražili pojedinačno, jer ako je neko protiv on vjerovatno za mjesne zajednice neće glasati. Treba da ide pojedinačno, jer nisu jedinstveni po cijelom prijedlogu.“*

*Hasan Hasančević, predsjednik kluba vijećnika SDA: „ Nije a,b,c i trebao si na vrijeme reći da glasamo pojedinačno i razdvojiti tačke. Nije ni to sporno. Ovako sada je stavljeno na dnevni red i tako i treba glasati.“*

*Senada Džanić, predsjednica kluba vijećnika SBB – BPS – SBiH: „Predsjedavajući, imali smo stav da ne glasamo ako nema predstavnika. Jesmo li zadržali taj stav?“*

*Selmin Karić, predsjedavajući Općinskog vijeća: „ Ovaj saziv nije donio nikakav zaključak vezano za to, tako da glasamo ovako kako je predloženo. Pojedinačno, je li Omere?*

*Ko je za Izvještaj o radu Savjeta Mjesne zajednice Klokočnica?*

*Glasanje: ZA – 14, PROTIV – 0, SUZDRŽANIH – 1.*

*Ko je za Izvještaj o radu Savjeta Mjesne zajednice Brijesnica Velika?*

*Glasanje: ZA – 14, PROTIV – 0, SUZDRŽANIH – 1.*

*Ko je za Izvještaj o radu Savjeta Mjesne zajednice Brijesnica Mala?*

*Glasanje: ZA – 14, PROTIV – 0, SUZDRŽANIH – 1.*

*Ko je za Izvještaj o radu Savjeta Mjesne zajednice Stanić Rijeka?*

*Glasanje: ZA – 10, PROTIV – 0, SUZDRŽANIH – 5.*

*Ko je za Izvještaj o radu Savjeta Mjesne zajednice Lukavica Rijeka?*

*Glasanje: ZA – 14, PROTIV – 0, SUZDRŽANIH – 1.*

**Ad.7. Razmatranje i usvajanje Izvještaja o radu Komisije za utvrđivanje prometne vrijednosti nepokretnosti i prava za 2020. godinu,**

*Selmin Karić, predsjedavajući Općinskog vijeća: „Tačku dajem na diskusiju. Prijavljenih nema. Ko je za?“*

*Glasanje: ZA – 15, PROTIV – 0, SUZDRŽANIH – 0.*

**Ad.8. Razmatranje i usvajanje Informacije o sigurnosti na području općine Doboj Istok za 2020. godinu,**

*Selmin Karić, predsjedavajući Općinskog vijeća: „Informaciju dajem na razmatranje.“*

*Hasan Hasančević, predsjednik kluba vijećnika SDA: „Ja neću puno o izvještaju, jer svi smo čitali i imali po raznoraznim stvarima doticanja sa ovim. Samo bih da mi kao Vijeće, a ne moramo se izjašnjavati ili Općinski načelnik da uputi dopis prema Ministarstvu za popunu radnih mjesta. To radimo x godina unazad i to je teško zbog same sigurnosti i bezbjednosti građana na području općine Doboj Istok. Zahvalio bih se svim uposlenicima naše Policijske stanice koja radi nekada maltene i nemoguće stvari, međutim u zadnje vrijeme moram naglasiti da imamo šetališta narkomana kroz Bosansku ulicu. Imam informaciju i u Bijeloj zemlji i tu su primopredaje razne. Svi mi znamo i ko to radi i da se oni privode i da se odvođe, međutim zato što je komandir ili vršilac dužnosti kako se već zove, da se uputi apel da ti ljudi koji se privredu da se probaju procesuirati u što kraćem vremenskom roku, jer su oni prijatnija za našu djecu. Ogromna prijatnija. Bit će možda kasno ako se roditelji ili stanovnici određenih naselja uključe u neke stvari i počnu, ja ću opet pričati narodnim jezikom, degenječit oko svojih kuća i onda je to već problem širih razmjera. Znači molim da se uputi prvo po pitanju broja uposlenika, jer ljudi fali. Sada nam počinju i sportska takmičenja i u tom dijelu će uvijek faliti jedan ili dva ili više, tako da u narednom periodu radi bezbjednosti to uputimo. Ovo što sam pričao komandir će to shvatiti onako kako zna da ja to govorim i molim sve da se uključimo i doprinesemo pomoći ka boljoj bezbjednosti naših građana Policijskoj stanici ili uposlenicima pojedinačno.“*

*Emira Karić, predsjednica kluba vijećnika SDP: „Ponovit ću još jedanput meni je jako dobra ova forma izvještaja, odnosno ovakav urnek, jako iscrpljujući i sadržajan i sve pohvale za takvu informaciju. Međutim ja ću se složiti sa kolegom Hasanom da ipak popričamo o nekim stvarima koje su konstruktivnije, koje i mi primjećujemo i bole nas. U Informaciji je navedeno da je u mjestu Mala Brijesnica smrtno stradalo lice u saobraćajnoj nezgodi. Sada je trenutno potez od benzinske pumpe Škrebo do, hajmo reći, mosta Velike Brijesnice po meni jedna crna tačka što se tiče saobraćaja. Prije ove saobraćajne nezgode dogodila se još jedna nezgoda gdje je ozbiljno ozlijeđen motorista. Poslije ove su se događale još neke i prije nekoliko noći dogodila se još jedna nezgoda u kojoj je čak i stub kod pekare stradao, pa neki problem tamo postoji. Znam, puna je linija, pa je isprekidana, pa je trenutno dosta poslovnih objekata i smatram da bi morali neke stvari uputiti. Ima znak, imaju dva znaka i to je sve propisno i puna linija je propisna i naravno da se vozači trebaju pridržavati svih tih propisa. Ali ako možemo učiniti još nešto da učinimo, jer i Amir je imao nezgodu prilikom skretanja kod Emosa, odnosno kod Škrebine benzinske i šta mislite da se u funkciju još stavi, eto otišla je piljara, pa da i ona radi, a onda preko puta imamo još jedan poslovni koji će vjerovatno raditi, jer idemo ka ekonomskom razvoju, pa smatram da nešto konstruktivno trebamo na tom potezu. Imamo otvorene kanale i nije to moj problem, odnosno problem vijećnice Emire Karić, pred čijom je kućom otvoren kanal koji prije svega nije higijenski i sto ću puta reći i znam da ovo Vijeće ne može, ali može koliko može. Smatram da bi tu bilo određeno proširenje, jer tu su tri kanala i hajde da bar riješimo na tom potezu. Znači tu su tri otvorena kanala koji bi, po meni bili određeno proširenje i kojim bi se mogle izbjeći neke saobraćajne nezgode. Kažem hajde da popričamo, nije na seoski način nego jednostavno praktičan način da se ovdje sa komandrom, odnosno onim koji su prisutni povodom neke tačke dnevnog reda da popričamo o onome što nas boli. Vjerujte mi mislim da će to biti crna tačka. Neću da aludiram ni na šta, ali previše je i samim tim otvaranjem pekare UNO, ne želim nikoga prozivati i hvala Bogu da je tu ta pekara i da se širi itd. ali tu nešto vozačima nije jasno. Da li mogu skretati ili ne mogu, puna se vidi, počnu skretanje, a onda shvate da ne smiju i onda se dogodi i sreća samo su materijalne štete i poslije ove nesreće ništa se ozbiljnije nije dogodilo, ali hajde da vidimo da li možemo nešto učiniti.“*

*Senada Džanić, predsjednica kluba vijećnika SBB – BPS – SBiH: „Prije svega čestitam na radu i ovakvom izvještaju Policijskoj stanici Doboj Istok. Znam da imate problem sa nedostatkom kadra i da se to proteže dugo godina, ali uistinu svaka vam čast što ste u svim momentima odgovorili, pa i u vrijeme pandemije svim zadacima koji su pred vama. Ja bih vas znači zamolila, jer smo imali vijećničko pitanje od strane Kemala Skopljaka vezano za migrante. Ja sam juče imala priliku u naselju u Stanić Rijeci da vidim dva migranta i vjerujte da se ja u tom momentu ne osjećam sigurno, a kamoli djeca. Tako da bih zamolila, pošto još nemamo odgovora na to vijećničko pitanje kakvo je stvarno stanje i jesu li migranti, bez obzira na ono obećanje načelnika, stigli u Doboj Istok, pa makar češće kontrole u skladu sa vašim mogućnostima, jer vjerujte nije ni malo prijatno pogotovo kada znate da oni traže prenoćište i na kraju krajeva i hranu, a mi ne znamo ni ko su, ni šta su, samo ih vidimo da šetaju pored naših kuća. Drugo, zamolit ću komandira koliko je u mogućnosti, vratit ću se sada na ovu vijećničku inicijativu da što češće patrola boravi, ja znam da vi imate obaveze i kod srednje škole i kod Osnovne škole „Klokotnica“, ali da imate ne obavezu, nego imam molbu da što češće patrola bude i u Stanić Rijeci da bi poradili na toj sigurnosti. Opet ću zamoliti komandira, imam od roditelja djece koja pohađaju Područnu školu u Brijesnici Maloj, vidjeli su problem i da se to često dešava, da se u ulici pored škole testiraju kamioni. Ta vozila se zaustavljaju zbog tehničke ispravnosti, a mjesto gdje se najčešće vrši testiranje je jedno od najprometnijih u naselju. Razumljivo je da se radnja testiranja motornih vozila treba obaviti, ali sa upitnom ispravnošću ne bi trebalo nikako u naseljenom mjestu, a pogotovo u mjestu gdje borave djeca. Ovo mi je dala neformalna grupa građana, pa ne znam ni koliko je to tačno, ali bih vas zamolila ako je to tačno da se testiranje tih kamiona vrši na nekom drugom mjestu. Još jednom čestitam na radu.“*

*Elvir Omerčić, zamjenik komandira Policijske stanice Doboj Istok: „ Prvo da vas sve pozdravim, ja sam zamjenik komandira, nisam komandir. Ići ću redom, gospodine Hasane, jeste tačno i vijećnici koji su bili u prošlom sazivu su upoznati sa tim da mi u Policijskoj stanici kuburimo sa tim nedostatkom ljudstva. Imamo određeni broj policajaca koji već imaju invalidnost i gledamo gdje ćemo sa tim ljudima, gdje da ih smjestimo i šta da radimo. Ono što želim reći nije to što nema ljudstva, pa ne možemo stići, mi se trudimo koliko možemo, pogotovo vidjeli ste puno puta da i ja izađem na cestu i da koordiniram, da uputim, da kažem i da pomognem policajcima, jer vjerujte da smo stvarno u situaciji što se tiče ljudstva i da od 2016. godine imamo taj problem. U ovoj pandemiji COVID-a koja nam je došla imamo obavezu obilaska tih lica koja su u samoizolaciji što je dodatni problem. Imamo problem migranata, a evo spomenula je gospođa Emira i ove probleme tamo i sve znam, sa svime sam upoznat. Vjerujte da ja za 24 sata imam jednu patrolu i kada uzmete da imam dva čovjeka koji su niz mjeseci na bolovanju, a nismo ni popunjeni, da imaju ljudi na godišnjem i mogu reći da sam ja stvarno stvarno zadovoljan da uspijemo išta uraditi. Neka neko dođe u stanicu kod mene, popit ćemo kafu i neka vidi u kakvim uslovima mi radimo. Ovo nije da se ja izvlačim, jer ja nisam neki govornik što se vidi po govoru, ja sam radnik i hoću raditi. 29 godina i 4 mjeseca ja radim ovaj posao i gledam da pomognem građanima. Kao što kaže Hasan problem droge, a vidjet ćete u ovom krivičnom djelu protiv zdravlja ljudi 2019. godine je podneseno 7 izvještaja o počinjenom krivičnom djelu, a ove godine 8 i kada bih vam rekao da su ove izvještaje uradila dva obična policajca. Po planu uprave policije ima poseban tim koji radi droge i to su inspektori koji samo rade droge. Naš čovjek je uvijek zastupljen u tom timu u Gračanici i oni većinom 80 – 90 % rade na području Gračanice. Dođu oni i tu, ali ovo što se tiče rezultata droge rade naši policajci. Kad god postoji mogućnost da postupimo, ovo što je gospodin Hasan rekao, da imamo operativna saznanja mi to prosljedimo dalje da ljudi odrade. Juče smo imali određene aktivnosti, hapšenja, lišavanje slobode i mi svoj dio posla odradimo, dokumentujemo, dokažemo i podnesemo krivične prijave. Vi znate da Tužilaštvo, odnosno postupajući tužilac nastavlja rad i po njegovim nalozima i mjerama se radi, hoće li ostati u pritvoru ili neće. Naše je znači da ga uhapsimo, prikupimo dokaze, odradimo što nam je naređeno u Tužilaštvu, dajemo tužiocu, dalje mi o*

postupku ne znamo šta se dešava. Mi dajemo maksimum. Vratio bih se na COVID da vam malo pojasnim da smo mi od početka pandemije izvršili 6733 obilaska, da smo napisali 833 službene zabilješke, da smo represivno djelovali, znate naredbe o ograničenju kretanja i da smo podnijeli 19 prekršajnih naloga. Tu smo gledali da budemo stvarno tolerantni, da više upozoravamo i bili smo prisiljeni represivno djelovati, jer drugačije nije moglo. Imali smo 4 prekršajna naloga protiv lica koja nisu poštovala samoizolaciju i da ste upoznati da imamo dvije krivične prijave protiv dva lica koja nisu poštovala samoizolaciju i to je čisto krivično djelo. Izvršili smo 85 pratnji raznoraznih lica koja su bila u samoizolaciji a koja su bila zaražena, izvršili smo i 213 pratnji sa vozilima. Po naredbama imali smo obavezu obilaska ugostiteljskih objekata i poslovnih i 3223 smo izvršili obilaska ugostiteljskih objekata i 321 lice upozorili zbog nenošenja maski. Ja mislim da same brojke govore a ovo sve je potkrijepljeno papirologijom i kod mene sve to stoji od početka pandemije. Gospođa Senada je pitala sa migrante. Lično po pitanju migranata Senada, od tebe imam dvolisnicu i pratim situaciju zato što me interesuje, a na kraju krajeva to mi je zadatak. Imam policajku koja to vodi i mi smo skoro imali sastanak sa predstavnicima Emausa i na tom sastanku je bio prisutan direktor upravne policije i inspektor, jer su nam rekli da po pitanju migranata imaju smještaj gore za 37 maloljetnika, tu je i direktor Centra za socijalni rad i na štabu smo nešto raspravljali, koji imaju starateljstvo. Imali smo u dva slučaja ekscesne situacije gdje smo i mi morali intervenisati. Direktor Emausa gospodin Okanović je rekao da je ugovor do kraja februara i da su oni na neki način bili prevareni kada je u pitanju prevoz migranta iz Bihaća iz Borića i da su to lica koja su pravila probleme po Unsko-sanskom kantonu, a oni su tražili da budu djeca maloljetnici koji su bili na ulici i da se pakupe i da tu budu smješteni. Svjedoci smo da ima situacija nekada u dva dana, nekada u pet da oni napuštaju taj objekat gore u Emausu. U tim njihovim ugovorima koje su potpisali sa Ministarstvom sigurnosti ta lica, migranti maloljetnici, kada samovoljno napuste taj kamp nemaju više pravo da se vraćaju. Mi smo pokušavali vršiti pritisak i prema kancelarijama za strance, međutim nismo uspjeli. Mi dolazimo u situaciju da nam jave iz kampa i kažu pobjeglo nam je 10 migranata. Angažujemo dva vozila, pa ih nađemo u Stanić Rijeci i obavijestimo gore kamp da smo našli, šta dalje i kažu nemojte ih vraćati nama, mi smo vas obavijestili i nemojte nam ih vraćati. Zovemo gore strance i pitamo šta ćemo sa njima, kažu uputite ih za Sarajevo. Oni ne znaju gdje je Maglaj, kakvo Sarajevo i da vam kažem da smo mi tu djecu nahranili u stanici, a snijeg pada i kud ćemo sa tom djecom, jer kome god se javiš spusti slušalicu, eto kakva je situacija kada su u pitanju migranti. Treba biti zadovoljan što mi nemamo problema kao drugi koji su u tranzitu, da nemamo krivičnih djela. Imali smo samo jedan ovaj slučaj što su uradili ovdje od ugostiteljskog objekta Žmigavac u Stanić Rijeci. Uspjeli ga naći, lišili ga slobode, utvrdili identitet, nema dokumenata, saznali od operativnog rada iz Gradačca ko je i šta je, momak je 2001. godište odradio to, polupao, predali Tužilaštvu, kažu pustite ga nema dokumenata. Ako vjerujete u kakvoj smo situaciji i kako radimo. Što se tiče gospođe Emire, Emira vi ste vidjeli kada je u pitanju rad saobraćajne policije mi imamo instruktivna akta i moramo voditi računa gdje ćemo službeno vozilo parkirati. Nije lijepo da mi parkiramo vozilo u nečije dvorište. Ružno je. Jedino ko nam je rekao da možemo doći i raditi i da ne smetamo je Alen Karić koji nam je ustupio parking i rekao slobodno kada nema radnika da dođemo i da radimo, da nećemo smetati. Ako ste vidjeli prelaz dole prema gospodinu Šemsi Bećiroviću mi postavljamo radar tu nekad i moramo voditi računa gdje ćemo parkirati vozilo, jer ljudi negoduju i ne daju kada im vozilo dođe u privatnost. Što se tiče smrtnih slučajeva u Maloj Brijesnici to je preuzelo odjeljenje kriminalističke policije i oni rade. Bilo bi dobro da ste ove inicijative što ste imali da idu Direkciji za puteve da malo češće iscrtavaju te linije, da provjeravaju signalizaciju i da češće postavljaju patrole preventivno.“

Emira Karić, predsjednica kluba vijećnika SDP: „Da li može da stoji znak radarska kontrola? On ovdje nije svrsishodan, jer ovdje ima semafor, jer kada se vidi semafor ljudi usporavaju. Mislim da treba taj znak premjestiti da li u sredini Velike Brijesnice, da se jednostavno tu smanji koliko ja mogu biti operativna.“

*Elvir Omerčić, zamjenik komandira Policijske stanice Doboj Istok: „Kada je radarska kontrola nije bitno da li ima znak ili nema. Ja vama smijem reći javno, masu puta kada se rade radarske kontrole mi dobijamo plan iz uprave policije i ne mogu ja reći daj radar i stavi ga tu, znači mjesec dana prije se plan pravi, a ima radar koji se postavi, a uopšte ne radi, uopšte nije uključen, to je preventivno. Vidjeli ste svako jutro je ispred Policijske stanice radar i nekada se postavi preventivno, pa nekada radi, a nekada ne radi upravo zbog srednje i osnovne škole, a prvenstveno zbog pješačkog prelaza, zbog djece. U Stanić Rijeci je tamo gdje ima trgovina često radar, nekada je uključen, a nekada nije, preventivno, jer nije sve ni u kazni, a sve je u cilju zaštite pješaka i učesnika u saobraćaju i u cilju smanjenja saobraćajnih nezgoda. Mi smo imali, a vidjeli ste tamo u izvještaju smrtne slučajeve, u Maloj Brijesnici imali smo smrtni slučaj i ne možemo predvidjeti kada će biti. Ovo što je Hasan predložio, volio bih ako postoji mogućnost da pokušate riješiti u Klokotnici zanatski centar, jer imamo masu prijave za nepropisno parkiranje – ulaz u CIPS. Ja znam da su se predstavnici Udruženja ratnih vojnih invalida obraćali i nama i općini. Ljudi su postavili taj znak i iscrtali su i ne znam, jer ne postoji općinska odluka. Mi imamo pritisak građana koji se žale konstantno i koji dolaze u CIPS da se nepropisno parkiraju vozila, a nemaju pravo, jer je iscrtano. Ja koristim ovu priliku za ovom govornicom da izglasate zaključak da se donese ta općinska odluka za postavljanje saobraćajnog znaka i da to bude legalno. Mi radimo i mi ćemo uraditi prekršaje, jer znak ima dole iscrtan i ja sam pojedincima koji su već dobili kazne rekao da je znak nacrtan i da li je on legalan da li nije legalan, da li postoji općinska odluka ili ne, mene to ne interesuje. Moja patrola kada dođe, neko je njega nacrtao i on će biti kažnjen i kada dođe na sud neka se žali, ima pravo, je li to legalno ili nije legalno. Ako ima li još kakvih pitanja, ja sam tu.“*

*Selmin Karić, predsjedavajući Općinskog vijeća: „Zahvaljujem se zamjeniku komandira. Ko je za ovu Informaciju?“*

*Glasanje: ZA – 14, PROTIV – 0, SUZDRŽANIH – 0 (vijećnik Dautović Nusret je trenutno odsutan).*

**Ad.9. Razmatranje i usvajanje Informacije o pripremnim aktivnostima za proljetnu sjetvu 2021. godine,**

*Selmin Karić, predsjedavajući Općinskog vijeća: „Tačku dajem na diskusiju.“*

*Emira Karić, predsjednica kluba vijećnika SDP: „Ne znam ko je predstavnik, želim da mi neko objasni. Ova forma je već viđena i ja bih se osvrnula na jednu rečenicu gdje se kaže planom je utvrđeno da se žitaricama, povrtnim, krmnim i ostalim biljem, zapravo da je proljetna sjetva manja u odnosu na prošlogodišnji plan. U ovom izvještaju nije se dotaklo po meni nekih ključnih stvari, a to je 100.000 koje dala Federacija za sve općine Tuzlanskog kantona i 100.000 od strane samog Tuzlanskog kantona. Znači naša općina bi trebala povući, odnosno da li je povukla, a o tome se i radi, 200.000 KM zato što neke općine zbog ne dobre koordinacije nisu povukle ta sredstva. Ja bih Samiru postavila pitanje da li je Općina Doboj Istok povukla sredstva od strane Federacije BiH 100.000 KM za proljetnu sjetvu i 100.000 KM od strane Vlade Tuzlanskog kantona? Ovdje se spominje da od 01.01. ide plan registra i ovdje spominjete da ste pravili ovu informaciju putem prijave plana u registar poljoprivrednih gazdinstava. Znam da se od 01.01. ide u taj neki projekat registracija poljoprivrednih gazdinstava i dokle ste došli? Da li je to kod nas već urađeno? Samo te praktične stvari registar poljoprivrednih gazdinstava, 100.000 od strane Federacije i 100.000 od strane Tuzlanskog kantona i zbog čega se ovdje kaže da će biti manja sjetva u odnosu na prošlogodišnji plan?“*

*Samir Mujkić, stručni saradnik za ruralni razvoj općine: „Sve da vas poselamim. Emirino pitanje vezano za proljetnu sjetvu, Općina je aplicirala na projekat od 200.000 KM kod federalnog ministarstva s tim da smo morali imati sufinansiranje na tom projektu i to je išlo po*



principu 100.000 Federacija i 100.000 Kanton. Mi smo provukli otprilike po 95.000 kako od Kantona, tako i od Federacije za proljetnu sjetvu na osnovu liste sačinjene od korisnika koji su se prijavili za tu sjetvu, s tim da je Općina jednim dijelom učestvovala u tome. U prvi mah su nam rekli da prijavimo i to je bilo ad hok u doba korone i mi smo prijavili preliminarnu listu 210 ljudi. Poslije nam je pomoćnik ministra Pejo Anić rekao i ko nije prijavljen na preliminarnu listu, jer sama riječ preliminarna znači da može doživjeti neku satisfakciju proširenja. U tom periodu mogli su se ljudi i dalje upisivati. Mi smo tu listu proširili za još 10 – 15 ljudi s tim da neki koji su u prvi mah došli na preliminarnu listu nisu prošli, bili su skinuti. Ukupna cifra je bila 210 ljudi koji su ostvarili to pravo s tim da se pojavilo 10 – 15 ljudi koji nisu bili na preliminarnoj listi. Mi smo bukvalno trebali da izvršimo povrat tih sredstava tih ljudi. U razgovoru sa načelnikom mi smo pokrili iz budžeta tu razliku i svi su ljudi uglavnom dobili. Znači oko 200.000 mi smo povukli, da budem precizniji oko 180.000 mi smo povukli po osnovu proljetne sjetve vezano za korona zakon. Javni poziv je takođe napravljen i za jesenju sjetvu i mi smo aplicirali na nekih 100.000 prema Federaciji na sufinansiranje i to je kao paket. Znači apliciramo na njega i poslije mi ne znamo koliko ćemo mi moći izvući iz tog sredstava. Apliciralo je negdje oko 80 ljudi. Na stranici općine bile su oglašavane liste kako za proljetnu tako i za jesenju sjetvu, odnosno preliminarne liste i imamo nekih 80 ljudi uključeno i ostvarit će se negdje oko 50.000 i nešto KM i za jesenju sjetvu. To je što se tiče korona zakona i proljetne i jesenje sjetve. Što se tiče registracije poljoprivrednih gazdinstava ona se vrši do 31. marta, odnosno ažuriranje kako mi kažemo i za plan sjetve se vrši do 12. mjeseca i ljudi u taj plan sjetve za narednu godinu stave otprilike čime će baratati i iz toga mi crpimo podatke i ubacujemo u ovaj plan. Kažete da ćete, ne znam, posijati toliko kukuruza, toliko pšenice, toliko povrća i to rade kako za biljnu tako i animalnu proizvodnju i mi na osnovu toga crpimo te podatke. To su ti preliminarni podaci sa kojima mi možemo raspolagati. Znači tamo je navedeno da mi ne raspoložemo sa takvom vrstom zemljišta, da nemamo organizovane proizvodnje i da je sve to na osnovu tih pokazatelja sa kojima mi možemo da izvučemo same poljoprivredne proizvođače koji nam se obraćaju putem tih registara kako kantonalnih, tako i federalnih. Uglavnom sva procedura ciklusa prijava i odjava tih gazdinstava teče čitavu godinu, a najaktuelnije je od 01.01. – 31.03. jer u toj fazi ljudi dolaze i prijavljuju da mogu ostvariti novčane podsticaje i svoja prava za tekuću godinu. Znači ljudi koji se sada upišu ostvarit će podsticaj tamo u avgustu ili septembru mjesecu zavisi od kojeg nivoa se traži.“

*Emira Karić, predsjednica kluba vijećnika SDP: „Ako je povučeno tih 200.000 da li onda očekuje da ovo neće važiti i da će biti veća zasijanost s tim ili će to biti samo pokrivanje onih svojih sredstava, ali vidjet ćemo. Htjela sam postaviti pitanje, sve je to iz medija, čini mi se da je Kina odlučila itekako intezivno da kupuje proizvode, eko proizvode iz Bosne i Hercegovine. Da li imate taj neki plan ili projekat koji bi išao prema našim poljoprivrednicima? U svakom slučaju on bi bio itekako pozitivan, jer bi se išlo u povećanje broja parcela, proizvoda itd.“*

*Samir Mujkić, stručni saradnik za ruralni razvoj općine: „ Mi što smo povukli 200.000 sredstava to je bilo za proljetnu sjetvu 2020. godine i ljudi su u koroni zasijali veće površine s tim da su vidjeli da ta korona nije toliko ozbiljno prihvaćena kod ljudi i kod vlasti i proizvodnja koja je zasijana ljudi su se susreli sa problemom kako utopiti. Ovo je plan proljetne sjetve za 2021. godinu i imali smo povećanje u 2020. godini i ljudi su se odmah osvijestili u 2021. godini. Znači manja će biti sjetva u 2021. godini iz razloga koje sam naveo. Ljudi su to malo više posijali u 2020. godini, jer su se bojali korone. Svako je sijao i ko je trebao i ko nije trebao. Sada u 2021. godini sijat će samo oni realni koji će sijati i oni će i zasijali. Što se tiče kineza mi ništa ni od koga nismo dobili i sve su to špekulacije iz medija što imamo. Da bi se išlo u neki organski sistem proizvodnje mi još nemamo na nivou države zakon o organskoj proizvodnji, tako da bi to išlo u organsku proizvodnju ili eko proizvodnju, ne znam. Mislím da su to neke medijske špekulacije, jer mi zvanično ništa nismo dobili.“*

*Selmin Karić, predsjedavajući Općinskog vijeća: „Ko je za ovu Informaciju?“  
 Glasanje: ZA – 15, PROTIV – 0, SUZDRŽANIH – 0*

**Ad.10. Informacija o stanju pandemije koronavirusa (COVID-19) na području općine Doboj Istok za period 01.03.-31.12.2020. godine.**

*Selmin Karić, predsjedavajući Općinskog vijeća: „ Tačku dajem na diskusiju.“*

*Kemal Skopljak, vijećnik BPS – Sefer Halilović: „ Dobili smo ovaj izvještaj i izvještaj sam po sebi govori šta i na koji način se radilo povodom izbijanja COVID pandemije u našoj Općini. Znači od prvog dana do danas šta se napravilo, a napravilo se naravno puno toga. Ja međutim želim da referišem druge stvari. Što se tiče našeg Doma zdravlja i pružanja usluga pacijentima oboljelim od COVID-a iz ličnog iskustva ja govorim što sam čuo gore u Kantonu i što sam vidio svojim očima da ni jedan dom zdravlja u Tuzlanskom kantonu nije napravio ovako dobar i uspješan put pacijenta od detekcije COVID-a do samog liječenja. Znači u startu su se poduzele sve mjere koje su trebale da se poduzmu i bile su veoma efikasne počev od HES-a, RTG službe, laboratorije, Hitne službe i transporta pacijenata sumnjivih i oboljelih od COVID-a. Odmah smo u startu izdvojili sanitet koji se nije miješao, pacijenti se nisu miješali, otvorili smo COVID ambulantu koja je odgovorila 150% zahtjeva kojim je trebalo da odgovori jedna COVID ambulanta. Angažovani su radiolog, vrhunski stručnjak i neurofiziolog, vrhunski stručnjak i ni jedan propust, stojim iza toga, nije se desio da oni koji su trebali otići na kliniku da su zadržani više nego što su trebali biti zadržani u Doboj Istoku, a nismo vozili ni bez veze pacijente koji nisu trebali ići gore da se dodatno inficiraju. Ja sam izašao ovdje prije svega da pohvalim samu organizaciju posla, da pohvalim ljude koji su odradili taj posao, pogotovo ljude koji su radili sa COVID pozitivnim pacijentima. Znači naš HES, moram ih nabrojati, rengen tehničar, laboratorija i Hitna služba. Sama informacija da smo mi u Hitnoj službi dostigli imunitet krda govori za sebe. Nismo se štedjeli i radili smo maksimalno u interesu građana općine Doboj Istok i u borbi, naravno, protiv ove pandemije. Još jednu stvar bih htio ovdje da podvučem. U Tuzli svi koji rade sa COVID pozitivnim pacijentima su na neki način nagrađeni, pa ću vam samo jedan primjer dati. Ljudi koji rade, a koji su srednje stručne spreme, medicinski tehničari koji rade sa COVID pozitivnim pacijentima imaju 500 KM dodatak na plaću. Ja ovdje to ne tražim, ali bih molio, pošto vidim da je i direktor prisutan, da iznađe mogućnost bar simbolično da nagradi ove ljude koji rade direktno sa COVID pozitivnim pacijentima. Znači da je tek prošli mjesec došlo rješenje da kada mi obolimo od COVID-a, imali smo 80 % plaće, a tek sada je došlo da se 100 % mora isplatiti. Znači kasnimo u svemu, pa bilo bi dobro u skladu sa mogućnostima, a ovo je samo prijedlog za direktora, ništa drugo.“*

*Hasan Hasančević, predsjednik kluba vijećnika SDA: „ Aferim za sve kompletno uposlenike i menadžment Doma zdravlja na čelu sa direktorom Kenanom. Imao sa situacija ružnih, bio sam teško bolestan i ovo što je Kemo govorio sve je to tako. Nažalost bit će toga, nekome se prigovori za dobar dan u ponašanju, pa nama kao pacijentima to možda smeta, ali to nije mjerilo njihovog rada, a mjerilo njihovog rada je ovo o čemu je Kemo pričao. Direktore, još jedanput aferim za do danas odraden posao i nadam se da će to biti u produžetku, s tim da molimo Boga da se što prije riješimo ove korone i da se i mi uozbiljimo sa svojim ponašanjem prema koroni. Sam način odvajanja mehaničkog prisustva COVID pacijenata u odnosu na zdrave pacijente ili one bez COVID-a govori koliko je ozbiljno menadžment pristupio toj vrsti posla. Ja sam razgovarao sa nekim ljudima iz Doboja i iz Bosanske Gradiške kada sam naručivao sebi lijekove, čak su me pitali koliko imate stanovnika pa je to tako organizovano i došli smo do raznoraznih razgovora i rekao sam otprilike 10 do 11.000 i ne mogu da vjeruju da je to tako organizovano, da mi imamo Dom zdravlja u ovom kapacitetu kojem imamo i da imamo usluge kao pacijenti u ovom*

*kapacitetu kojem imamo. Tako još jedanput zahvaljujem se svima i da nastavimo svi zajedno tako raditi.“*

*Kenan Mujkić, direktor JZU Dom zdravlja Doboj Istok: „ Prije svega želim sve da vas pozdravim i poselamim. Drago mi je da čujem ovako lijepe pohvale i zaista mi ćemo i dalje nastojati to opravdati, jer nije to još pri kraju kao što mislimo, ali nadamo se da smo došli do neke imunizacije stanovništva. Kolega Kemale, kao da vam čitam misli, jer mi do sada nismo obilježavali Dan Doma zdravlja, a to je 26.03. tako da ćemo po prvi puta ove godine obilježiti ovaj dan, prikladno shodno epidemiološkoj situaciji, a između ostalog bit će nagrađeni svi koji su učestvovali i saradivali sa COVID pozitivnim pacijentima.“*

*Selmin Karić, predsjedavajući Općinskog vijeća: „ Stručan pristup i kada imate rukovodioce koji znaju šta hoće i naravno radnike koji su isto tako privrženi tom poslu sve se može i ja se ovom prilikom zahvaljujem direktoru i svim uposlenicima Doma zdravlja Doboj Istok. S obzirom da je ovo bila samo informacija i ne izjašnjavamo se po njoj i ako nema neko još šta da doda ja bih zaključio današnju sjednicu i zahvaljujem se na prisustvu.“*

*Sjednica je završena u 12,10 sati.*

*ZAPISNIČAR  
Behara Hadžić*

*SEKRETAR OPĆINE  
Omer Hadžić*

*PREDSJEDAVAJUĆI  
OPĆINSKOG VIJEĆA  
Selmin Karić*

*Službena zabilješka:*

*Zapisnik je usvojen na 5. redovnoj sjednici Općinskog vijeća Doboj Istok održanoj dana 25.03.2021. godine.*

*U Klokotnici, dana 26.03.2021. godine*

*Zabilješku sačinio  
Omer Hadžić, sekretar Općine*